

Kalata gwa kwanda ugwa Johani Isyakulongosya

Ƴntamigwa Johani aasimbile kalata ujũ kũ biitiki bamo aba aabaganile bo ulwa baanaake. Ikubapyelesya abiitiki ukwendelela ukwima kanunu ndwitiko kwa Kyala mwa Jesu Kilisiti, kangi ikubasoka ukusikaana imanyisyo sya bamanyisi baa butungulu, aba baalimo nkipanga kya Kyala. Ikubakumbusya abiitiki ukuti umwene aali na Jesu, po ulo ameenye nalooli ukuti Jesu aali nũ mbili ugwa mundũ bo ulwitũ, kangi aali Mwana gwa Kyala. Ikubasisimikisya abiitiki ukuti, aabikujaga nũ buumi bwa bwila na bwila, linga bikwendelela ukummwitika Jesu. Ikubabũula ukuti abiitiki bikulondigwa bwila bannganega Kyala nũ kũganana abeene.

Isi silimo mwa kalata ujũ
Jesu lyo isyu ilya buumi
Abiitiki bajege ndumuli, bajege bandũ baa Kyala abaa kusũ
Abiitiki baana baa Kyala, bagananega
Abiitiki bajege maaso na bamanyisi baa butungulu, bendele
Ƴkubutola ubutulanongwa nũ kaja nũ buumi bwa bwila na

Jesu lyo isyu ilya buumi

¹ Tukubalumbilila inongwa isya ujũ jo isyu ili lili nũ buumi, ujũ aaliko ukufuma kubwandilo

bwa kiisu.* Uwe twalimpiliike na kummbona na maaso giitu, twankeetaga na kumpalamaasya na maboko giitu.

² Ujo jo bwandilo bwa buumi aaboniike, uwe twalimmbwene. Liilino tukubasisimikisya na kubabuula inongwa isya ujo, uju ikutupapo ubuumi bwa bwila na bwila. Ujo aali kwa Taata Kyala, aaboniike kumyitu.†

³ Tukubalumbilila inongwa isya ujo Jesu Kilisiti, uju twalimmbwene na kumpilika, ukuti nuumwe muje pamopeene na nuuswe mbuliilanisi ubu tuli nabo mwa Taata Kyala, na Mwanaake‡ ujo.

⁴ Tukubasimbila isi, ukuti tusekele fijo.

Ukwenda ndumuli lwa Kyala

⁵ Kangi iisya ili twalipiliike kwa Jesu, ili tukubalumbilila umwe lyo ili. Kyala jo lumuli, apa alipo jikajapo ingiisi najimo.

⁶ Linga gwesa jumo pakati pamyitu ikuti, “Ndi na buliilanisi na Kyala,” kuno ikwendelela ukutuugala mu ngiisi, atikutuugala mbwanalooli, looli ikujoba isya butungulu.

⁷ Looli linga tukutuugala ndumuli bo ulwa Kyala, po tukujaga baliilanisi, twe baabo batupha. Kangi iilopa lya Mwanaake Jesu Kilisiti likutwelusya ubutulanongwa bwitu boosa.

⁸ Linga tukuti uwe tukaja na butulanongwa, tukwisyoba twibeene, kangi ubwanalooli bukajamo mmyitu.

* **1:1 1:1** Bala kalata gwa Ubwandilo 1:1; Johani 1:1-3. † **1:2 1:2** Bala kalata gwa Johani 1:14. ‡ **1:3 1:3** **UMwanaake** Bala iisya **UMwana gwa Kyala** ku Isyakulingaania.

9 Looli linga tukwilaata imbiibi syitu, Kyala ikutuhobokela nu kutwelusya ububiibi bwitu boosa, paapo umwene ngolofu kangi nsuubiligwa.

10 Linga tukuti tukatula inongwa, tukummbiika Kyala ukuja ntungulu, kangi iisyu lyake likajamo mmyitu.

2

Jesu ikusumila abandũ kwa Taata Kyala

1 Baanangu ndwitiko, ngubasimbila inongwa isi, ukuti mulingabombaga ubutulanongwa. Looli nalinga umundu abombile ubutulanongwa, tuli nagwe ugwa kutusumila kwa Taata Kyala, ujo jo Jesu Kilisiti, uNgolofu.

2 Jesu lyo ikemo lya kubooligwa. Ku njila jaa ikemo ilyo, aabusosiisyeemo ubutulanongwa bwitu, kangi aatufwenie na Kyala. Kangi bomma ubutulanongwa bwitu bwene, looli nu butulanongwa ubwa bandu boosa.

Ulagilo lwa Jesu ulwa kuganana

3 Linga tukusikonga indagilo sya Kyala, sikunangisya ukuti tummeenye Kyala.

4 Umundu uju ikuti, "Nummeenye Kyala," looli atikusikonga indagilo syake, ntungulu, ubwanalooli bakajamo mmyake.

5 Looli gwesa uju ikulikonga iisyu lya Kyala, ujo annganile Kyala nalooli. Iji jo njila ijaa kumanya ukuti tuli mwa Kyala.

⁶ Umundu ujū ikuti, “Ndi mwa Kyala,” ikulondigwa ajege na kajiilo bo aka aali nako Jesu.

⁷ Bakundwe, ululagilo ulu ngubasimbila lukaja lupya, looli lo lulalula ulwa ijolo ulu mwali nalo ukufuma mbwandilo bwa kummwitika Jesu.* Ululagilo ulu ulwa ijolo lyo isyu ili mwapiliike.

⁸ Looli poope ululagilo ulu ngubasimbila lupya. Ubwanalooli bwa isi ngusijoba, isya lulagilo ulu, bukuboneka mwa Jesu Kilisiti na mmyinu, bukunangisya ukuti ingiisi jikusooka, ulumuli lwa nalooli lukwanda ukatumulikila.

⁹ Gwesa ujū ikuti, “Ndi ndumuli,” kuno ammbengile umwitiki nnine, akaali ali mu ngiisi.

¹⁰ Gwesa ujū annganile umwitiki nnine, ujo ikwendelela ukuja ndumuli. Kakajamo nakamo nkati mmyake akaa kunngwikisya mbutulanongwa.

¹¹ Looli gwesa ujū ammbengile umwitiki nnine jo ali mu ngiisi, ikwenda mu ngiisi, jo akamanya na kuno ikulabila, paapo ingiisi jinkupikiile kumaaso.

¹² Nikubasimbila umwe mwe baanangu nd-witiko,
paapo ubutulanongwa bwinu muhobokeli-
igwe,
ku njila jaa ngamu jaa Jesu Kilisiti.

¹³ Nikubasimbila umwe baataata,
paapo mummeenye Jesu Kilisiti,
ujū aaliko ukufuma kubwandilo bwa kiisu.
Nikubasimbila umwe mwe balumyana na mwe
balindwana,

* 2:7 2:7 Bala kalata gwa Johani 13:34.

paapo muntolile Seetano.
Nikubasimbila umwe mwe baanangu ndwitiko,
paapo mummeenye Taata Kyala.

¹⁴ Nikubasimbila umwe baataata,
paapo mummeenye Jesu Kilisiti,
uju aaliko ukufuma kubwandilo.

Nikubasimbila umwe mwe balumyana na mwe
balindwana,
paapo muli na maka,
iisyu lya Kyala lilimo mmyinu,
kangi muntolile Seetano.

Ukujja maaso na balugu baa Kilisiti

¹⁵ Po leelo mulingatuganaga utundu utwa
nkiisu muno utu batuganile aba bakampanya
Kyala. Linga umundu atuganile utundu utu,
akaja nu lugano kwa Kyala mu ndumbula jaake.

¹⁶ Ububiibi ubwa nkiisu bo ubu. Ukunyonywa
ifya mbili, ifinyonyo ifya maaso nu kwijumbika
kunongwa jaa kaja ni kyuma. Fyosa ifyo fi-
tikufuma kwa Taata Kyala, looli fikufuma nkiisu.

¹⁷ Ikiisu pamopeene ni finyonyo fyake ifibiibi
fikukinda. Looli uju ikubomba ubwigane bwa
Kyala, ikukaba ubuumi bwa bwila na bwila.

¹⁸ Baanangu, amasiku gaa kummaliikisyo
gafikile! Mupiliike ukuti undugu gwa Kilisiti†
ikwisa, na ulu abalugu bingi biisile. Po
apa tusimanyiile ukuti teli mmasiku gaa
kummaliikisyo.

¹⁹ Abalugu abo baafumile kumyitu, looli
ku bwanalooli bakaali pamopeene na nuuswe,

† **2:18 2:18** Undugu gwa Kilisiti Kokuti uju ikumpinga Kilisiti.

paapo linga baali pamopeene na nuuswe ku bwanalooli, ngali basyele kumyitu. Looli baasookileko ukuti siboneke pabwelu ukuti boosa bakaali pamopeene na nuuswe.

²⁰ Pamopeene na isyo, umwe Jesu abapeele Mbepo gwake,[‡] ulu mwesa mubumeenye ubwanalooli.

²¹ Nikubasimbila kalata ujū, kukaja kokuti mukabumanya ubwanalooli, looli paapo mubumeenye. Kangi paapo umwe mumeenye ukuti ubutungulu boosa butikufuma mbwanalooli.

²² Umundu untungulu jo jwani? Jo jula ikukaana ukuti Jesu jo Meesija. § Umundu bo ujo jo ndugu gwa Kilisiti, ikunkaana Taata Kyala nu Mwanaake.

²³ Linga umundu ikunkaana uMwana, akaja pamopeene na Taata Kyala. Looli linga umundu ikummwitika uMwana, ali pamopeene na Taata Kyala.

²⁴ Looli umwe, amasyu aga mwalyambiliile ukufuma kubwandilo bwa kummwitika Jesu, gendelelege ukuja mmyinu. Linga amasyu ago gikwendelela ukuja mmyinu, po na nuumwe mukwendelelaga ukuja mMwana, na mwa Taata Kyala.

²⁵ Isyo syo isi aafingile uMwana kumyitu, ko kaja nu buumi bwa bwila na bwila.

²⁶ Nikubasimbila inongwa isi isya bandu aba bikulonda ukubasobesya umwe.

[‡] 2:20 2:20 *Abapeele Mbepo gwake* Ubagiile ukuti *Abapakile amafuta.* § 2:22 2:22 *Meesija* Bala ku isyakulingaania.

²⁷ Looli umwe, mwambiliile Mbepo Mwikemo, ujũ ali nkati mmyĩnu. Ujo jo ujũ ikubamanyisya syosa, imanyisyo syake sya bwanalooli, sikaja sya butungulu. Kunongwa ijo sitikulondigwa ukuti umundu abamanyisye.* Bo muno Mbepo abamanyiisye, mwendelelege ukũja mwa Kilisiti.

Abiitiki baana baa Kyala

²⁸ Liilino baanangu, mwendelelege ukũja pamopeene na Kilisiti, ukuti akabalilo akaa kwisa kangi, twise tũjege bakifu. Tungiisa kwibiilila kunongwa jaa kũja ni soni pi isiku lyake ilya kwisa kwake.

²⁹ Mumeenye ukuti Kilisiti ngolofu. Kunongwa ijo mumanye ukuti kukuti mundũ ujũ ikubomba isya bugolofu, ujo jo mwana gwa Kyala.

3

¹ Namukeete muno Taata atuganiile fiijo, mpaka tukujobigwa ukũja baanaake! Nalooli bo tuli. Abandũ aba batikantiila Kyala bakatumanya, paapo bakammanya umwene.

² Bakundwe, liilino uswe tuli baana baa Kyala, looli sikamanyigwa muno aatukujilaga. Looli tumeenye ukuti akabalilo kaa Kilisiti ukwisa kangi, tukwisa kũja bo umwene, paapo tukwisa kummbona muno ajilile.

³ Kangi gwesa ujũ ikusuubila bo ulo, ukuti ikwisa kũja bo umwene itolo, iijeelusyege ukuti aje mwikemo, bo ulũ Kilisiti juũjo mwikemo.

⁴ Gwesa ujũ ikubomba ubutulanongwa, ikubomba bo ulwa jũla umwila ndagilo,

* 2:27 2:27 Bala kalata gwa Johani 14:26.

namanga ukubomba ubutulanongwa ko kwila indagilo.

⁵ Looli mumeenye ukuti Kilisiti aaliisile kukubusoosyamo ubutulanongwa bwitu. Kangi umwene atikubomba ubutulanongwa nabumo.

⁶ Gwesa ujū ikwendelela ukaja mwa Kilisiti, atikwendelela ukwila indagilo syake. Joope ujū ikwendelela ukwila indagilo syake, akamm-bonamo Kilisiti, kangi akammanya ukuti jo jwani.

⁷ Baanangu, mulingiitikaga ukuti umundu gwesa jula abasobesye. Umundu ungolofu nkyeni mwa Kyala, ujo jo ujū ikubomba isya bugolofu, bo ulu Kilisiti ngolofu.

⁸ Looli umundu ujū ikubomba ubutulanongwa gwa Seetano, paapo Seetano ikwendelela ukubomba ubutulanongwa ukufuma kubwandilo bwa kiisu. Jo nongwa iji, uMwana gwa Kyala* aaliisile pakiisu, ukusyonanga imbombo sya Seetano.

⁹ Gwesa ujū mwana gwa Kyala atikwendelela ukubomba ubutulanongwa, paapo nkati mnyake Kyala aabiikile ubuumi bwake jujo. Akabagila ukwendelela ukubomba ubutulanongwa paapo umwene mwana gwa Kyala.

¹⁰ Looli umundu ujū atikubomba inunu, pamo akanngana umwitiki nnine, ujo akaja mwana gwa Kyala. Mo muno tukukumanyila ukulegana ukwa baana baa Kyala na baa Seetano.

* **3:8 3:8 uMwana gwa Kyala** Bala ku Isyakulingaania.

Ƴkuganana

11 Indumi iji mwajipiliike ukufuma kubwandilo bwa kummwitika Jesu, jo iji jikuti tugananege.

12 Tulingajaga bo Kaini. Aali gwa Seetano! Aalinngogile unnuguna!† Fiki aalinngogile? Paapo syosa isi aabombile unnuguna syali nunu. Umwene aabombile imbiibi.

13 Po mwe baamyitu ndwitiko, mulingaswigaga ukubengigwa na bandu aba batikuntiila Kyala.

14 Uwe tubaganile abiiniitu, fyobeene tumeenye ukuti tusookilemo mmaka gaa bufwe, twingiile mbuumi bwa bwila na bwila. Umundu uju akaja na lugano, asyele mmaka agaa bufwe.‡

15 Gwesa uju ikummbenga umwitiki nnine, ngogi. Mumeenye ukuti akajako unngogi uju ali nabo ubuumi bwa bwila na bwila nkati mmyake.

16 Uwe tulumeenye ulugano muno lujiliile, paapo Kilisiti aabuningile ubuumi bwake kunongwa jitu. Na nuuswe bo lulalula tukulondigwa tubuningege ubuumi bwitu kunongwa jaa biitiki biiniitu.

17 Po gwesa unkabi gwa kyuma kya nkiisu, linga ikummbona umwitiki nnine aagiilwe fimo, looli akaja ni ndumbula ijaa kibabilisi, ikujobaga buleebule ukuti ali nalo ulugano lwa Kyala?

18 Baanangu, tulingajobaga peene pa kanwa ukuti tubaganile abiiniitu, looli tubaganenge nalooli ku njila jaa kubabombela inunu.

† **3:12 3:12** Bala kalata gwa Ubwandilo 4:1-8. ‡ **3:14 3:14** Bala kalata gwa Johani 5:24.

19 Ukubagana abiiniitu bo ulo, tubagiile ukumanya kisita kwilaamwa, ukuti tukubakonga ubwanalooli. Kangi indumbula syitu sikutengaana nkyeni mwa Kyala,

20 nalinga tukulongigwa mu ndumbula, paapo tumeenye ukuti Kyala jo nkulumba ukusikinda indumbula syitu. Kangi umwene asimeenye syosa.

21 Bakundwe, linga tutikulongigwa mu ndumbula syitu, po tubagiile ukuja nu bukifu ubwa kusegelela nkyeni mwa Kyala.

22 Kangi tukwambilila ukufuma kumyake koosa aka tukunsuuma, paapo tukusitiila indagilo syake nu kubomba isi sinkyeliile.

23 Ululagilo lwake lo ulu, ukuti tujitike ingamu jaa Mwanaake Jesu Kilisiti, nu kuganana, bo muno aatulagiliile.

24 Kangi gwesa uju ikusitiila indagilo sya Kyala, ikwendelela ukuja mwa Kyala, joope Kyala ikwendelela ukuja mmundu ujo. Tumeenye ukuti Kyala ali nkati mmyitu. Buleebule? Paapo aatupeele Mbepo Mwikemo gwake.

4

Injila jaa kubamanya abamanyisi baa bwanalooli na baa butungulu

¹ Bakundwe, paapo abakunguluka bingi abaa butungulu baboniike pakiisu, mulingabiitikaga abandu boosa aba bikuti bali na Mbepo gwa Kyala, looli mubakeetege kanunu ukuti abandu abo bikulongosigwa na Mbepo gwa Kyala pamo mma.

² Injila jaa kummanya ukuti umundu ikulongosigwa na Mbepo gwa Kyala jo iyi. Gwesa ujū ikwitika nu kujoba ukuti Jesu Kilisiti aaliisile alinkuja nu mbili bo ugwa mundu, ujo jo ujū ikulongosigwa na Mbepo gwa Kyala.

³ Looli gwesa ujū atikummitika Jesu bo ulo, atikulongosigwa na Mbepo gwa Kyala. Umundu ujo ikulongosigwa ni mbepo jaa ndugu gwa Kilisiti. Umwe mupiliike ukuti imbepo ijo jikwisa, na ulu jiiisile pakiisu.

⁴ Looli baanangu, umwe muli bandu baa Kyala, mubatulile abandū abo abaa butungulu, paapo Mbepo gwake ujū alimo nkati mmyinu, umwene ali na maka ukunkinda Seetano, ujū ikubalongsya abandū abaa pakiisu.

⁵ Abakunguluka abo abaa butungulu baa pakiisu, bikujoba isya pakiisu. Boope abandū abaa nkiisu bikubapilikisya.

⁶ Looli uswe tūli bandu baa Kyala. Umundu ujū ammeenye Kyala, ikutupilikisya, looli umundu ujū akaja gwa Kyala, atikutupilikisya.

Ku njila ijo tukukumanya ukulegana ukwa bandu aba bikulongosigwa na Mbepo gwa bwanalooli, na kuli bala bikulongosigwa ni mbepo ijaa butungulu.

Kyala abaganile abaanaake, po boope bagananege

⁷ Bakundwe, tugananene, paapo ulugano lukufuma kwa Kyala. Umundu gwesa ujū abaganile abanine, jo mwana gwa Kyala, kangi jo ammeenye Kyala.

⁸ Looli umundu uju akabagana abanine, akamanyanya Kyala, paapo ulugano lukufuma kwa Kyala.

⁹ Kyala juju aatunangiisye ulugano lwake ku njila jaa kuntuma umwanaake jumojwene ntiga nkiisu muno, ukuti mo tubwagile ubuumi.

¹⁰ Ulugano ulwa nalooli kukaja kokuti tunnganile Kyala! Looli umwene jo uju aatuganile uswe, mpaka aalintumile nu Mwanaake, aje ikemo lya kubooligwa ukuti abusoosyemo ubatulanongwa bwitu nu kutufwania na Kyala.

¹¹ Bakundwe, linga Kyala aatuganile uswe bo ulu, tukulondigwa na nuuswe tugananenge.

¹² Akajako umundu najumo uju ammbwenemo Kyala. Looli linga tukuganana, Kyala ikwendelela ukaja nkati mmyitu, nu lugano lwake lukwisula nkati mmyitu.

¹³ Tumeenye ukuti tukwendelela ukaja mwa Kyala, joope Kyala ikwendelela ukaja nkati mmyitu, paapo atupeele Mbepo gwake.

¹⁴ Uswe tusibwene, kangi tukubanangisya abangi, ukuti Taata Kyala aalintumile umwanaake pakiisu, ukuti aje Mpoki gwa bandu.

¹⁵ Umundu gwesa uju ikwitika ukuti Jesu Mwana gwa Kyala, Kyala ikaja nkati mmyake, joope ikaja nkati mwa Kyala.

¹⁶ Liilino uswe tumeenye nu kwitika ukuti Kyala atuganile.

Ulugano lukufuma kwa Kyala. Gwesa uju ikaja ndugano lwake, ikaja moope mwa Kyala

jujwo, na kangi Kyala ikwendelelaga ukujja nkati mmyake.

17 Jo nongwa iyi, ulugano lwake Kyala lukwisula nkati mmyitu, ukuti tujje bakifu pi isiku lya kulongigwa, paapo ubuuni bwitu nkiisu muno, bufwene bo muno Jesu aatugaliile pakiisu.

18 Apa pali nu lugano pakaja nu lutende, looli ulugano ulwa nalooli lukulusoosya ulutende loosa, paapo ukulongigwa ko kuno kukubapelela abandu ukujja nu lutende. Gwesa ujja ali nu lutende, ulugano lwa Kyala lakiisula nkati mmyake.

19 Uswe tukuganana, paapo Kyala aatalile ukutugana.

20 Linga jumo ikuti, "Nunnganile Kyala," kuno ammbengile umwitiki nne, ntungula. Po gwesa ujja akanngana unne, ujja ikummbona na maaso, abagiile buleebule ukunngana Kyala ujja atikummbona?

21 Kyala atupeele ululagilo ukuti gwesa ujja annganile Kyala, ikulondigwa ukuti annganege joope umwitiki nne.*

5

Ukubutola ubutulonongwa bwa pakiisu

1 Gwesa ujja ikwitika ukuti Jesu jo Meesija, ujo jo Mwana gwa Kyala. Gwesa ujja annganile umpaapi, annganile nu mwana gwa mpaapi ujo.

* 4:21 4:21 Bala kalata gwa Maalika 12:30-31.

2 Muno mo muno tukumanyilamo ukuti tubaganile abaana baa Kyala. Ku njila jaa kunnngana Kyala, nu kusitiila indagilo syake.

3 Po ukunnngana Kyala ko kusitiila indagilo syake, kangi indagilo syake sikaja sito,

4 paapo gwesa ujũ jo mwana gwa Kyala, ikusitola isya pakiisu. Ulo mo muno tusitoliile isya pakiisu, ku lwitiko lwitu.

5 Bule, jo jwani ujũ abagiile ukusitola isya pakiisu? Mwene ujũ ikwitika ukuti Jesu Mwana gwa Kyala.

6 Umwana ujũ jo Jesu Kilisiti, ujũ aabonike apa, ukufuma akabalilo aka aalyosiigwe na miisi mpaka akabalilo aka iilopa lyake lyalyonike. Looli akaalyosiigwe itolo, aalyonile iilopa lyake lyope. Joope Mbepo Mwikemo nkeeti, ikusisimikisya ukuti isyo sya nalooli, paapo Mbepo Mwikemo jo bwanalooli.

7 Fyobeene bali batatu aba bikusisimikisya inongwa sya Jesu.

8 Mbepo Mwikemo, amiisi gaa koosigwa, ni ilopa ilya kufwa kwake. Abo bali nu bukeeti ubu bukwtikana.

9 Linga tukubwitika ubukeeti bwa bandũ, ubukeeti bwa Kyala bukũlumba ukũkindapo, paapo jo Kyala juũjo ujũ ikusisimikisya isya Mwanaake.

10 Umundu gwesa ujũ ikummwitika umwana gwa Kyala, ikubukola kanunu ubukeeti ubo ubwa Mwana nkati mmyake. Looli ujũ atikummwitika Kyala, ammbiikile Kyala ukuti ntungulu, paapo akabwitika ubukeeti ubu Kyala ikusisimikisya isya Mwanaake.

11 Ubukeeti bo ubu, Kyala atupeele ubuumi bwa bwila na bwila, ubuumi ubo tukubwagila ku Mwanaake.

12 Umundu gwesa ujū ali pamopeene nū Mwana gwa Kyala, ali nabo ubuumi ubo. Looli ujū akaja pamopeene nū Mwana gwa Kyala, akaja nū buumi ubo.

Ukujā nū buumi bwa bwila na bwila

13 Mbasimbiile amasyū aga, mwe mujiitiike ingamu jaa Mwana gwa Kyala, ukuti mumanye ukuti muli nabo ubuumi bwa bwila na bwila.

14 Tuli bakifu nkyeni mwa Kyala, paapo tumeenye ukuti ikutupilika, linga tukunsuuma fyosa fila ukufwana nū bwigane bwake.

15 Po tumeenye ukuti ikutupa ifi tukunsuuma fyosa fila, paapo ikutupilika bo tukunsuuma.

16 Buliko ubutulanongwa ubu butikummbiika umundu kubutali na Kyala bwila na bwila. Linga umundu ikummbona umwitiki nnine ikubomba ubutulanongwa bo ubo, ansuumilege kwa Kyala, po Kyala ikumpapo ubuumi. Sikujā bo ulo kuli aba bikubomba ubutulanongwa bo ubo. Looli buliko ubutulanongwa ubu bukummbiika umundu kubutali na Kyala bwila na bwila. Une ndikuti ansuumilege kwa Kyala kunongwa jaa butulanongwa ubo.

17 Ukubomba syosa sila isi sikabagisya nkyeni mwa Kyala, ko kubomba ubutulanongwa. Looli pamopeene na isyo, buliko ubutulanongwa ubu butikummbiika umundu kubutali na Kyala bwila na bwila.

18 Tumeenye ukuti abaana baa Kyala batik-wendelela ukubomba ubutulanongwa. Umwana

gwa Kyala, Jesu Kilisiti, ikubalindilila. Seetano akabagila ukubabombela simo.

¹⁹ Tumeenye ukuti uswe tuli baana baa Kyala, abangi boosa nkiisu bikulagiligwa na Seetano.

²⁰ Kangi tumeenye ukuti uMwana gwa Kyala aaliisile, atupeele amahala, ukuti tummanyeye ujũ jo Kyala gwa nalooli. Tuli mbwanalooli ubo paapo tuli mMwanaake Jesu Kilisiti. Ujo jo Kyala gwa nalooli, kangi jo buumi bwa bwila na bwila.

²¹ Baanangu, mujege maaso mulingiipuutaga ku tundu, paapo utundu akaja jo Kyala.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

14ff4521-53e4-562c-aacb-6f4faf55a6c8